

Thashaina Seraus ta cla pe Weganan Pan Americano

Aña pasa e la inmigra pa Merca pa combina su estudio y su deporte stima cu ta bowling. Awor un aña despues y den relativamente corto tempo e la logra asina hopi premio cu e mes nunca a pensa riba nan. E atleta di bowling Thashaina Seraus a bira un berdadero revelacion pa loke ta e bowling universitario na Merca y mas cu claro un bon momento pa nos haci un entrevista cu su persona y a puntra su preparacion Pan Americano.

E interes pa e deporte a bini cu su apenas 5 aña di edad ora su welo tabata entrena dos bes pa siman y tabata hiba Thashaina hunto cun'e bowling. Asina e la cuminsa bou guia di Lilly Arends y Rita Lopez Henriquez, unda su prome competencia tabata un torneo di Halloween. Su prome competencia internacional tabata cu su 8 aña na Costa Rica. Thashaina su inspiracion pa e deporte di bowling



a bini door cu e la lanta cun'e den famia y den bowling e por ta su mes. E ta controla e bala y e wega ta depende di su so. E tabata kier a siña con pa domina e bala di bowling y crea su propio estilo.

Aña pasa Thashaina a logra un haya un beca pa Merca pa sigui cu su estudio y combina esaki cu su deporte. Den prome instante esaki tabata duro mirando cu e mester a bandona su famia y su yiu pa busca su futuro. Pero asina

e la ripara cu tur cos ta cana hopi bon na Aruba e la adapta lihe y a cuminsa bay hopi bon den su estudio y su deporte bowling. E apoyo y sosten di su compañeronan di ekipo como tambe su coach a duna su persona un extra empuhe pa e traha mas duro. Asina tambe cosnan a cuminsa cana den bon direccion pa loke ta su estudio pero mas cu tur cos su deporte preferi cu ta bowling. Hunto cu su scol Thashaina a logra varios premio grandi den NCAA, pero

e premionan individual tabata asina hopi cu e mes nunca a para keto un rato di kico tur e la logra den corto tempo. Awor numa ora e pensa bek, e ta realisa con grandi cada un di e logronan aki tabata ta.

Thashaina ta sinti su mes bon pa loke ta e Weganan Pan Americano di Toronto, sigur si e compara su mes cu cuater aña pasa. E ta mas madura, experiencia y sigur mas relaha, e sentimento di miedo a bay

por completo. E la bira un hungado mucha mas miho y ta adapta su mes lihe na su wega como tambe na e la y e balanan di bowling, un cuestion cu antes no tabata bay facil. E no kier bisa mucho pa loke ta su prestacion pa cu e Weganan Pan Americano, pero e ta sinti cu Aruba su seleccion ta hopi fuerte mes y tur pais lo bay pa e medaya di Oro. Cu Aruba tin e posibilidad di medaya? Claro pakico no! □

